



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

32. Kalenderwoche – ab 9. August 2009

Zuggordiede

Nu is widdor Schulanfang. Mid dor Zuggordiede wern de Kinnor in de Schule geloggd. Wie jedes Jahr duds widdor een Jahrgang von Kinnorn erwischn – Schluß mid ludsich, ab jedzde gibbds Zensuhrn! Die Zuggordiede is schnell lährgefressn. In dor Schule isses dann kee Zuggorschleggn mähr – in dor Schue gibbds fiehr alles Zensuhrn – keen Zuggor! Das is nähmlisch dor haubdsäschliche Unnorschied zu vorhähr un ooch zu hinnorhähr. Vorhähr gabs een Glabbs offn Bo, wenn was nisch rischdisch gewähsn is, odor, wens ohkee war, is mor gelohbd wordn un had een Bongbong odor e Eis gegrischd zur Belohnung.

Hinnorhähr – wenn de de Schule ferdsh hasd – kannsde machen, was de willsd – da gibbds keene Zensuhrn mähr. Da mussde dir dann ooch meisdens dei Eis alleene koofn. Seldn, dass disch jemand annersch belohnen dud - wenn isch da jedzde ma gongrehd an misch denk n due.

Na, wenn isch irschendwelschn Misd gemachd hab, da dud meine Gudste soford mid mir rummeggorn, abor wenn isch keen Misd gemachd hab, sondorn sogahr fleißisch gewähsn bin... nee, da duds zu Belohnung hoeschdesn e Bier gähm, was isch mir selbor ausm Giehlschrank holn darf. Abor da muss isch schon werglisch sähr fleißisch gewähns sein! Schiehr iebormenschlich!

Viel heifischer is ehm, dass mid mir rumgemeggord wird. Un das dud misch ganz un gahr nisch anschborn – das dud misch bloß boggisch machn. Frostdiern odor wie das heeßd!

Un das is bei de Kinnor ooch nisch viel annorsch. Un wens de nu so e Beschvochl bisd als Kind, där in dor Schule eenfach nischd off de Reihe grischn dud – immor bloß hohe Nummorn bei de Zensuhrn... beim Einskundsloof is eene Sechskommanull eene Suborwärdung, abor ehm nisch in

dor Schule! – dann hasde nischd zum Lachn. Un alle dun das dann ehm ooch merkn, dass de nischd off de Reihe grischsd. Weeschn die bleedn Zensuhrn. Die dun ja am Ende im Zeischnis schdehn – unbarmhärzisch! Un alln mussde dei Zeischnis zeischn. Dähn Eldorn sowieso, aber ooch de Oma un dor Oba wolln das Zeischnis sähn... un Dandn un Onkels... - un alle dun dann denkn, dass de bißl bleede bisd. Friehor hammse se sisch geschdriddn, nach wähm de nu komm dusd – ganz dor Oba! Nee, ganz dor Baba! Das is dann vorbei, wensde so e schwährgewischdisches Zeischnis hasd. Da frachn se alle, nach wähm das Kind wohl komm dud – nach mir jednfalls nisch!

Nee, de Zensuhrn sinn gemeene. Daderbei isses ja schon ofd so gewähsn, dass welsche, die in dor Schule vorsachd hamm, dann im Lähm de Greeßdn gewordn sinn. Ooch dor Einschdein soll in dor Schule ziehmlich doof gewähsn sein. Jednfalls nach de Zensuhrn.

Un daderdrum dun mir die kleen Schulanfängor mid dor Zuggordiede immor bißl leid. Die frein sisch off de Schule un wissn noch nisch, wasse sisch da offladn dun. Wennse Besch hamm! Un rischdisch Gligg ham ehm immor bloß e baar Ausnahm. Meisdens de annorn!

Eduard Sachsenmeyer